

2429

宋六十名家詞

冊三

卷之十一 雜著

小山詞

目錄

臨江仙八調

蝶戀花十五調

鷓鴣天十九調

生查子十三調

南鄉子七調

清平樂十八調

玉樓春廿一調

減字木蘭花三調

洞仙歌一調

菩薩蠻九調

阮郎歸五調

浣溪沙二十調

六幺令三調

更漏子六調

御街行二調

浪淘沙四調

訴衷情八調

碧牡丹一調

望仙樓一調

行香子一調

點絳脣五調

少年遊五調

虞美人九調

採桑子二十六調

踏莎行四調

留春令三調

清商怨一調

長相思一調

醉落魄四調

西江月二調

武陵春三調

解佩令一調

泛清波摘徧一調

歸田樂一調

河滿子二調

于飛樂一調

愁倚闌令三調

破陣子一調

好女兒二調

兩同心一調

滿庭芳一調

風入松二調

秋蕊香二調

思遠人一調

鳳孤飛一調

慶春時二調

喜團圓一調

憶悶令一調

梁州令一調

燕歸來一調

小山詞目錄

小山詞

宋 晏幾道

臨江仙

鬪草階前初見穿鍼樓上曾逢羅裙香露玉釵風靚
妝眉沁綠羞豔粉生紅 流水便隨春遠行雲終與
誰同酒醒長恨錦屏空相尋夢裏路飛雨落花中

又

身外閒愁空滿眼中歡事常稀明年應賦送君詩細
從今夜數相會幾多時 淺酒欲邀誰勸深情唯有
君知東溪春近好同歸柳垂江上影梅謝雪中枝

又

淡水三年歡意危絃幾夜離情曉霜紅葉舞歸程客
情今古道秋夢短長亭 綠酒尊前清淚陽關疊裏
離聲少陵詩思舊才名雲鴻相約處煙霧九重城

又

淺淺餘寒春半雪銷蕙草初長煙迷柳岸舊池塘風
吹梅蕊閉雨細杏花香 月墮枝頭懽意從前虛夢
高唐覺來何處放思量如今不是夢真箇到伊行

又

長愛碧闌干影芙蓉秋水開時臉紅凝露學嬌啼霞

觴熏冷豔雲髻裊纖枝 煙雨依前時候霜叢如舊
芳菲與誰同醉采香歸去年花下客今似蝶分飛

又

旖旎仙花解語輕盈春柳能眠玉樓深處綺窗前夢
回芳草夜歌罷落梅天 沈水濃熏繡被流霞淺酌
金船綠嬌紅小正堪憐莫如雲易散須似月頻圓

又

夢後樓臺高鎖酒醒簾幕低垂去年春恨卻來時落
花人獨立微雨燕雙飛 記得小蘋初見兩重心字
羅衣琵琶絃上說相思當時明月在曾照彩雲歸

又

東野亡來無麗句于君去後少交親追思往事好沾
巾白頭王建在猶見詠詩人 學道深山空自老留
名千載不干身酒筵歌席莫辭頻爭如南陌上占取
一年春

蝶戀花

卷絮風頭寒欲盡墜粉飄紅日日香成陣新酒又添
殘酒困今春不減前春恨 蝶去鶯飛無處問隔水
高樓望斷雙魚信惱亂層波橫一寸斜陽只與黃昏
近

又

初撚霜紈生悵望隔葉鶯聲似學秦娥唱午睡醒來
慵一餉雙紋翠簟鋪寒浪雨罷蘋風吹碧漲脈脈
荷花淚臉紅相向斜貼綠雲新月上彎環正是愁眉
樣

又

庭院碧苔紅葉徧金菊開時已近登高宴日日露荷
凋綠扇粉塘煙水澄如練試倚涼風醒酒面雁字
來時恰向層樓見幾點護霜雲影轉誰家蘆管吹秋
怨

又

喜鵲橋成催鳳駕天爲歡遲乞與初涼夜乞巧雙蛾
加意畫玉鉤斜傍西南掛分鈿擘釵涼葉下香袖
凭肩誰記當時話路隔銀河猶可借世間離恨何年
罷

又

碧草池塘春又晚小葉風嬌尚學娥妝淺雙燕來時
還念遠珠簾繡戶楊花滿綠柱頻移紋易斷細看
秦箏正似人情短一曲啼鳥心緒亂紅顏暗與流年
換

又

碾玉釵頭雙鳳小倒暈工夫畫得宮眉巧嫩麴□□
羣勝□鴛鴦繡字春衫好三月露桃春意早細看
花枝人面爭多少水調聲長歌未了掌中杯盡東池
曉

又

醉別西樓醒不記春夢秋雲聚散真容易斜月半窗
還少睡畫屏閒展吳山翠衣上酒痕詩裏字點點
行行總是淒涼意紅燭自憐無好計夜寒空替人垂
淚

又

欲減羅衣寒未去不卷珠簾人在深深處殘杏枝頭
花幾許啼紅正恨清明雨盡日沈香煙一縷宿酒
醒遲惱破春情緒遠信還因歸燕誤小屏風上西江
路

又

千葉早梅誇百媚笑面凌寒內樣妝先試月臉冰肌
香細膩風流新稱東君意一稔年光春有味江北
江南更有誰相比橫玉聲中吹滿地好枝長恨無人
寄

又

金翦刀頭芳意動綵蕊開時不怕朝寒重晴雪半消
花鬟鬢曉妝呵盡香酥凍十二樓中雙翠鳳綳綳
歌聲記得江南弄醉舞春風誰可共秦雲已有鴛屏
夢

又

笑豔秋蓮生綠浦紅臉青腰舊識淩波女照影弄妝
嬌欲語西風豈是繁華主可恨良辰天不與纔過
斜陽又值黃昏雨朝落暮開空自許竟無人解知心
苦

又

碧落秋風吹玉樹翠節紅旌晚過銀河路休笑星機
停弄杼鳳帷已在雲深處樓上金鍼穿繡縷誰管
天邊隔歲分飛苦試等夜闌尋別緒淚痕千點羅衣
露

又

碧玉高樓臨水住紅杏開時花底曾相遇一曲陽春
春已暮曉鶯聲斷朝雲去遠水來從樓下路過盡
流波未得魚中素月細風尖垂柳渡夢魂長在分襟
處

又

夢入江南煙水路行盡江南不與離人遇睡裏銷魂
無說處覺來惆悵銷魂誤欲盡此情書尺素浮雁
沈魚終了無憑據卻倚鯢紋無別緒斷腸移破秦箏
柱

又

黃菊開時傷聚散曾記花前共說深深願重見金英
人未見相思一夜天涯遠羅袖同心閒結徧帶易
成雙人恨成雙晚欲寫彩箋書別怨淚痕早已先書
滿

鷓鴣天

彩袖殷勤捧玉鍾當年拚卻醉顏紅舞低楊葉樓心
月歌盡桃花扇影風從別後憶相逢幾回魂夢與
君同今宵剩把銀缸照猶恐相逢是夢中

又

一醉醒來春又殘野棠梨雨淚闌干玉笙聲裏鶯空
怨羅幕香中燕未還終易散且長閒莫教離恨損
朱顏誰堪共展鴛鴦錦同過西樓此夜寒

又

梅蕊新妝桂葉眉小蓮風韻出瑤池雲隨綠水歌聲

轉雪繞紅綃舞袖垂 傷別易恨歡遲惜無紅錦爲
裁詩行人莫便銷魂去漢渚星橋尚有期

又

守得蓮開結伴遊約開萍葉上蘭舟來時浦口雲隨
棹採罷江邊月滿樓 花不語水空流年年判得爲
花愁明朝萬一西風勁爭尚朱顏不奈秋

又

鬪鴨池南夜不歸酒闌紈扇有新涼雲隨碧玉歌聲
轉雪繞紅綃舞袖回 今感舊欲沾衣可憐人似水
東西回頭滿眼淒涼事秋月春風豈得知

又

當日佳期鵲誤傳至今猶作斷腸仙橋成漢渚星波
外人在鸞歌鳳舞前 歡盡夜別經年別多歡少奈
何天情知此會無長計咫尺涼蟾亦未圓

又

題破香箋小砑紅詩多遠寄舊相逢西樓酒面垂垂
雪南苑春衫細細風 花不盡柳無窮別來歡事少
人同憑誰問取歸雲信今在巫山第幾峯

又

清潁尊前酒滿衣十年風月舊相知憑誰細話當時

事腸斷山長水遠詩 金鳳闕玉龍塢看君來換錦
袍時姁娥已有殷勤約留著蟾宮第一枝

又

醉拍春衫惜舊香天將離恨惱疎狂年年陌上生秋
草日日樓中到夕陽 雲渺渺水茫茫征人歸路許
多長相思本是無憑語莫向花箋費淚行

又

小令尊前見玉簫銀燈一曲太妖嬈歌中醉倒誰能
恨唱罷歸來酒未消 春悄悄夜迢迢碧雲天共楚
宮腰夢魂慣得無拘檢又踏楊花過謝橋

又

楚女腰肢越女顚粉圓雙蕊髻中開朱絃曲怨愁春
盡淥酒杯寒記夜來 新擲果舊分釵冶遊音信隔
章臺花閒錦字空頻寄月底金鞍竟未回

又

十里樓臺倚翠微百花深處杜鵑啼殷勤自與行人
語不似流鶯取次飛 驚夢覺弄晴時聲聲只道不
如歸天涯豈是無歸意爭奈歸期未可期

又

陌上濛濛殘絮飛杜鵑花裏杜鵑啼年年底事不歸

去怨月愁煙長爲誰 梅雨細曉風微倚樓人聽欲
沾衣故園三度羣花謝曼倩天涯猶未歸

又

曉日迎長歲歲同太平簫鼓閒歌鍾雲高未有前村
雪梅小初開昨夜風 羅幕翠錦筵紅釵頭羅勝寫
宜冬從今屈指春期近莫使金尊對月空

又

小玉樓中月上時夜來唯許月華知重簾有意藏私
語雙燭無端惱暗期 傷別易恨歡遲歸來何處驗
相思沈郎春雪愁銷臂謝女香膏懶畫眉

又

手撚香箋意小蓮欲將遺恨倩誰傳歸來獨臥逍遙
夜夢裏相逢酩酊天 花易落月難圓只應花月似
歡緣秦箏若有心情在試寫離聲入舊絃

又

九日悲秋不到心鳳城歌管有新音風凋碧柳愁眉
淡露染黃花笑靨深 初見雁已開砧綺羅叢裏勝
登臨須交月戶纖纖玉細捧霞觴灩灩金

又

碧藕花開水殿涼萬年枝外轉紅陽昇平歌管隨天

仗祥瑞封章滿御牀 金掌露玉爐香歲華方共聖
恩長皇洲又奏圓屏靜十樣宮眉捧壽觴

又

綠橘梢頭幾點春似留香蕊送行人明朝紫鳳朝天
路十二重城五碧雲 歌漸咽酒初醺儘將紅淚溼
湘裙贛江西畔從今日明月清風憶使君

生查子

金鞍美少年去躍青驄馬牽繫玉樓人繡被春寒夜
消息未歸來寒食梨花謝無處說相思背面鞦韆

下

又

輕勻兩臉花淡掃雙眉柳會寫彩箋時學弄朱絃後
今春玉釧寬昨夜羅裙皺無計奈情何且醉金杯

酒

又

關山魂夢長魚雁音塵少兩鬢可憐青只爲相思老
歸傍碧紗窗說與人人道真箇別離難不似相逢

好

又

墜雨已辭雲流水難歸浦遺恨幾時休心抵秋蓮苦

忍淚不能歌試托哀絃語絃語願相逢知有相逢
否

又

一分殘酒霞兩點愁蛾暈羅幕夜猶寒玉枕春先困
心情翦綵慵時節燒燈近見少別離多還有人堪
恨

又

輕輕製舞衣小小裁歌扇三月柳濃時又向津亭見
垂淚送行人溼破紅妝面玉指袖中彈一曲清商
怨

又

紅塵陌上游碧柳隄邊住纔趁彩雲來又逐飛花去
深深美酒家曲曲幽香路風月有情時總是相逢
處

又

長恨涉江遙移近溪頭住閒蕩木蘭舟臥入雙鴛浦
無端輕薄雲暗作廉纖雨翠袖不勝寒欲向荷花
語

又

遠山眉黛長細柳腰肢裊妝罷立春風一笑千金少

歸去鳳城時說與青樓道徧看潁川花不似師師好

又

落梅亭榭香芳草池塘綠春恨最關情月過闌干曲
幾時花裏閒看得花枝足醉後莫思家借取師師宿

又

狂花頃刻香晚蝶纏綿意天與短因緣聚散常容易
傳唱入離聲惱亂雙蛾翠游子不堪聞正是衷腸事

又

官身幾日閒世事何時足君貌不長紅我鬢無重綠
榴花滿餞香金縷多情曲且盡眼中歡莫嘆時光促

又

春從何處歸試向溪邊問岸柳弄嬌黃隴麥回青潤
多情美少年屈指芳菲近誰寄嶺頭梅來報江南信

南鄉子

綠水帶青蘋水上朱闌小渡橋橋上女兒雙笑靨妖

燒倚著闌干弄柳條 月夜落花朝減字偷聲按玉
簫柳外行人回首處迢迢若此銀河路更遙

又

小蕊愛春風日日宮花花樹中恰向柳綿撩亂處相
逢笑靨旁邊心字濃 歸路草茸茸家在秦樓更近
東醒去醉來無限事誰同說著西池滿面紅

又

花落未須悲紅蕊明年又滿枝唯有花間人別後無
期水闊山長雁字遲 今日最相思記得攀條話別
離共說春來春去事多時一點愁心入翠眉

又

何處別時難玉指偷將粉淚彈記得來時樓上燭初
殘待得清霜滿畫闌 不慣獨眠寒自解羅衣襯枕
檀百媚也應愁不睡更闌惱亂心情半被閒

又

畫鴨懶熏香繡茵猶展舊鴛鴦不似同衾愁易曉空
牀細剔銀燈怨漏長 幾夜月波涼夢魂隨月到蘭
房殘睡覺來人又遠難忘更是無情也斷腸

又

眼約也應虛昨夜歸來鳳枕孤且據如今情分裏相